



SURAT PASTORAL

SA SOLEMNIDAD NI SAN PEDRO BAUTISTA, TITULAR NA PATRON KAN ARCHIDIOCESIS NIN CACERES

San Pedro Bautista, Kagmukna nin mga Cristianong Comunidad

Sa pagcelebrar niato kan kafiastian kan Titular na Patron kan Archidiosesis nin Caceres, nagpapasalamat kita sa Dios huli ki San Pedro Bautista na nagmukna nin mga Cristianong comunidad digdi sa Bikol. Bilang sarong Franciscanong misionero, pinangenotan niya an pagtogdas kan mga banwaan kan Baao, Buhi, asin Libmanan sa Camarines Sur, dangan an Cagsawa, Oas, asin Ligao sa Albay.

Namundag sa Avila, España kan 1542, asin sinugo pasiring sa Filipinas kan 1584, ibinalangibog niya an Tataramon kan Dios sa paagi nin paglakbay kaibahan an mga tawo. Enot, hiningowa niyang masabotan naggad an saindang cultura, dangan giniyahan sinda pasiring sa buhay comunidad na nakagamot sa Evangelio. Nadukhayan ta saiya an panalmingan asin inspiracion sa pangapodan kan Simbahan pasiring sa sinodalidad. Pinabagsik kan sayang pagkamoot sa Kagurangnan, isinarô nya an sayang sadiri kaibahan an mga tawo, dangan naghawan nin dalan tanging sinda magtalubo sa pagtubod. Ini an satong panànw para sa Saradit na Kristyanong Komunidad (SKK) o *Basic Ecclesial Communities* (BEC)—na sa gracia nin buhay gikan sa Banal na Espiritu, sinda nagigin dalan nin pagkasararô, participacion, asin mision.

Sínodalidad sa Contexto kan SKK

Sa paagi kan SKK, madadara ta sa lambang harong an Evangelio: durungan kitang makakapagpamibi, magdidinarangogan, dangan makakapaglingkod sa lambang sarô bilang magturugang ki Cristo. Sa satuyang SKK, madudukhayan ta an Simbahan na totoong buhay, kun saen an lambang sarô minagibo kan sayang mga katongdan na inako sa bonyag. Kun an mayayaman asin mga nagtitios, an mga mababagsik asin mga may kakundian, an jovenes pa asin may-edad na gabos naki-ayon sa SKK, bilang sarong sínodong Simbahan, kakayanon tang rumpagon an gabos na mga kaulangan.

Dinaog ni San Pedro Bautista an kaulangan na dara kan lenggwahe huli ta an itinataram niya lenggwahe kan pagkamoot nin Dios. Nasabotan niya an mga katutubo huli ta dinangog niya sinda gamit an sayang puso. Kun kaya giniyahan nya an mga tawo bako sana sa paagi nin

pagtukdo, kundi pagsabuhay nanggad kan Evangelio. Ginadan bilang martir sa cruz sa Nagasaki, sa nacion kan Hapón kan 1597, mayo nanggad nang iba pang kaipohan na patotoo sa imbod niya sa Dios. An saiyang buhay asin kagadanan iyo an mga hariging giya kan satuyang SKK.

An Satuyang Direccion Pastoral

Kan Febrero 2020, sa pagpintakasi ki San Pedro Bautista, sararô tang irinokyaw an panuga na “pakusogon an mga paghiro niato sa pagbilog nin mga Saradit na Kristyanong Komunidad sa satong mga parokya.”

Poon kaidto, nagkapirang mga parokya an naninimbagan sa pangapodan. An satong mga nagibo huli nanggad sa mga kapadian asin mga laico na, sa gracia kan Banal na Espiritu, itinao an saindang mga sadiri sa SKK dawa ngani nasa tahaw kita nin pandemia.

An pandemia nagdara nin dai linalaoman asin mga bâgong kasakitan, alagad pinapusog kaini an satuyang paghulaw. Tinawan kaini nin doon an katotoohan na an sociedad nakagamot nanggad sa saradit na mga comunidad. An espiritu kan bayanihan na nagpalaad sa mga pagtaraid na harong pwedeng magtulod sa bilog na nacion pasiring sa aksyon. Ini man an paagi na gigibohon ta sa paghaman kan satong vision. Kaipohan pagkasararoon kan satong mga parokya an mga tawo, lambang harong, pasiring sa bâgong dalan nin pagigin Simbahan.

Kun kaya sinasadol ko an mga kapadian na pangenotan an paghimo nin SKK Pastoral Plan sa saindang mga parokya. An planong pastoral na ini iyo an magigin susogan tanganing an lambang parokya makompunir nin mga Saradit na Kristyanong Komunidad na panô nanggad nin buhay. Igwa nin mga parokya kun saen an mga SKK actibong kaayon sa mga programang pastoral. Hinahagad ko sa mga Vicario Foranio (*Vicars Forane*) na pamayohan an paghirirasan nin mga experiencia asin mga mararahay na paghiro, tanganing orog pang mapakusog an kakayahan kan mga parokya na magtogdas nin SKK. Manlaen-laen an mga contexto kan mga parokya, alagad gabos kita kaipohan na magsabuhay kan mision kan Simbahan.

Nangangapodan ako sa archdiocesan ministry clusters—*Worship, Education, Social Services, Temporalities, Youth, Clergy, and Laity*—na isihon an mga pagkakataon nin pagkasararô asin pagtinarabangan tanganing bilog na makaayon nanggad kamo sa direccion na ini. Particular na hinahagad ko sa Education Ministry Cluster na pakusogon nanggad an mga paghiro na napônan na, tanganing danay pang maanduyogan an opisina kan SKK. An *formation program* para sa SKK kaipohan na magin gibong pagtinarabangan, dagos-dagos, asin nagsisimbag sa mga realidad kan satuyang panahon.

Pagtapos

Ngonian na taon, sinasarhan ta an celebracion kan Ika-Limang Gatos na Taon kan Cristianismo sa Filipinas. Nag-aandam man kita para sa Sínodo para sa Sínodalidad. An mga muhon na ini nagsasadol satuya na torohokan naggad kun pânong an satong mga comunidad pagtubod minarokyaw kan Evangelio sa paagi nin tataramon asin gibo. Sa paagi kan SKK, makakapaglingkod kita sa Dios asin sa banwaan, orog na sa mga nagtitios, siring kan ginibo ni San Pedro Bautista na may pusog na kaimbodan.

Sa satuyang pagpintakasi saiya asin paagi ta na man nin paki-olay na kita saiyang ipamibi asin tabangan, sa paghingowa ta sa pagmukna nin mga SKK, sasabaton asin ibubugtak niato an saiyang reliquiáng tûlang sa Metropolitanong Catedral sa Ika-lima kan Febrero, alas-dos cuarentang y cinco nin pagkahapon. Lugod ini magin sarong pagpapasaksi sa satuyang panuga na durungan na maglakbay tanganing an lambang SKK, siring sa pisog nin mustasa, magtalubo sa pagtubod asin kabansayan.

Lugod, an mamomoton na pag-ataman ni Ina danay na maggiya sato, bilang Simbahan na nagtotogdas kan Kahadean kan Dios digdi sa kinaban.


✠ ROLANDO J. TRIA TIRONA, OCD, DD
Arzobispo nin Caceres

Febrero 6, 2022
Ciudad nin Naga, Filipinas